

Date – 01/10/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Sinlung Hills Council inthlan vawi 2-na neih tura hman tur Final Electoral Roll tihchhuah a ni .**
- 2. Swachhata Hi Seva 2024 hnuaiiah faina beihpui thlak mek a ni.**
- 3. Jammu & Kashmir Assembly inthlan thawh thumna atan tukin dar 7 atang khan vote thlak a ni.**
- 4. Prime Minister Narendra Modia chuan nimin khan Israel Prime Minister Benjamin Netanyahu biain tunhnaia Asia khawtlang lama thilthleng mekte a sawipui.**

<><><>

SHC POLLS

State Election Commission ruahman angin Sinlung Hills Council inthlan vawi 2-na neih tur atan Final Electoral Roll chu nimin khan tihchhuah a ni a,

Aizawl DC, District Election Officer Pu Lalhriatpuia chuan Aizawl DC Conference Hall-ah a tlangzarh a. Aizawl District huamchin a Sinlung Hills Council Electoral Roll Final Publication a Elector awmzat chu a vaiin Voter 10,799 awmin mipa 5338 leh hmeichhia 5461 an ni a, mipa aia hmeichhia an tamna chu 123 a ni. Voter tlemna ber Polling Station chu Upper Sakawrdai Polling Station niin Voter 112 an awm a. Voter tamna ber chu Sakawrdai I Polling Station niin Voter 1219 an awm a. Sinlung Hills Council, Aizawl District huam chinah hian Constituency 6 awmin Polling Station hi 19 a awm a ni.

Electoral roll tlangzarhna ah hian political party leh tlawmngai pawl aiawhte leh Aizawl SP, Education Department leh DIPRO atangte in an tel a ni.

Kolasib District huamchhunga Constituency pahnih -Saipum leh Saiphai Constituency bial pahnih Final Electoral Roll chu Kolasib District Election Officer, Pu Robert C. Lalhmangaiha chuan DC Conference Hall-ah a tlangzarh a.

Saipum Constituency ah Vote nei mipa 1134 leh hmeichhia 1161, an vaiin mi 2295 an awm a; Saiphai Constituency-ah mipa 1329 leh hmeichhia 1319, an vaiin mi 2648 an awm a; Saipum Constituency a hian Polling Satation pathum heng Saipum-I, Saipum-II leh Chawnpui Polling Station te an awm a. Saiphai

Constituency-ah Polling Station pali : Saiphai-1, Saiphai-11, Phainuam leh Saihapui V Polling Station a awm a ni.

Nimin vek khan Saitualah District Bawrhsap, District Election Officer ni bawk Dr. Lalngura Tlau pawhin Final Electoral Roll hi a tlangzarh.

Saitual District chhungah Constituency 4; Khawlian, Phuaibuang, Suangluilawn leh Vanbawng chhungah a awm a, vote nei mi 8047 (mipa 4074 leh hmeichhia 3973) an awm mek a, Polling Station ah 4-NE Tlangnuam, Phuaibuang, Suangpuilawn leh Vanbawngahte Mipa voter aiin Hmeichhe voter an tam zawk a ni.

Constituency 4 zingah -Khawlian ah vote nei mi 2392 (mipa 1208 leh hmeichhia 1184) awmin an tam ber a, Vanbawngin dawtin vote nei mi 1981 (mipa 1024 leh hmeichhia 957) an awm a, Suangpuilawnin dawt lehin voter 1930 (mipa 969 leh hmeichhia 961) awmin, 2-Phuaibuang ah voter 1744 (mipa 873 leh hmeichhia 871) awmin vote nei awm tlemna ber a ni.

Final Electoral Roll tlangzarhnaah hian election official te, BLO te NGO pawl hrang hrang aiawhte leh party aiawhte an kalkhawm a, tlangzarh a nih hnu hian Political Party aiawhte hnenah Final Electoral Roll copy hnih theuh hlan nghal a ni.

Sinlung Hills Council inthlan hun tur hi tunkar Ningani hian State Election Commissioner Pu H. Lalthlangliana'n a pisa-ah a puang dawn a. Pu H. Lalthlangliana hian Ningani chhun dar 12 khian chanchinbumite chu Sinlung Hills Council inthlan chungchangah a kawm duh thu hriattirna a chhuah tawh a. Hetah hian member 12 awmna Sinlung Hills Council inthlan hun tur hi a puang dawn niin Akashvani Aizawl chuan thu a dawng a. Inthlan hun hi November thla bul lam a nih rin a ni. Sinlung Hills Council inthlan hi a vawi hnihna tur niin a hmasa ber chu November ni 5, 2019 khan buatsaih a lo ni tawh a. Khami tum khan MNF 5, HPC 5 leh independent 2 an tling a. Tun term chung hian thuneihna chelhtu executive council vawi 3 an insiksawi a, tunah hian HPC inthana a pakhat zawk leh ZPM tangrualin sorkarna an chelh mek a ni.

Tun hma a Sinlung Hills Development Council tih thin kha April 2, 2018 a HPC (D) leh Mizoram sorkar inremna thuthlung zul zui-in Sinlung Hills Council ti a a hming thlakin thuneihna sang zawk pek a ni a. Hemi atan hian July ni 5, 2018 a pawm tak Sinlung Hills Council Act, 2018 hmangin Sinlung Hills Council hi din a ni ta a ni.



MIZO GUV

Larsap Dr. Hari Babu Kambhampati-a a theih loh chhunga a ai lo awh lailawk tura ruat Tripura Larsap Indra Sena Reddy Nallu-a chu nimin khan rinawmna thu tiamtira lakluh a ni.

Pu Indra Sena Reddy Nallu-a hi Gauhati High Court Judge Justice Nelson Sailo chuan nimin chawhma dar 10 khan Raj Bhavan Banquet Hall-ah thu tiamtirin a la lut a, he hunah hian Chief Minister Pu Lalduhoma, Assembly

Speaker Pu Lalbiakzama, Minister Pu K. Sapdanga, Pu Vanlalhlana, Pu Lalsawivunga, Pu Lalthansanga, Pi Lalrinpuui, Pu Vanlalruata, Pu B. Lalchhanzova, Prof Lalnilawma, Deputy Speaker Pu Lalfamkima, Lok Sabha MP Pu Richard Vanlalmangaiha leh sawrkar mi pawimawh dang te an tel a ni.

Larsap Dr. Hari Babu Kambhampati-a hi a khawsik a reh hleih theih loh avangin tun thla ni 7 khan Trinity Hospital-ah a lut a, a that theih mai loh avangin tun thla vek ni 9 khan Hyderabad-a Star Hospital ah dah luh a ni a. Doctor ten a hriselna dinhmun an enfiah hnuah chuap lamah harsatna a nei tih hmuhchhuah a ni a, tunah hian enkawl mek a ni.

<><><>

SWACHHATA LUNGLEI

Swachhata Hi Seva 2024 hnuai faina beihpui thlak kalpui mekah nimin khan Urban Development & Poverty Alleviation (UD&PA) Department Lunglei hnuai faina lama hna thawktu (sanitation worker)-te hriselna dinhmun chu Convention Centre, Lungleiah Health & Family Welfare (H&FW) Department Lungleia thawktute'n an endiksak.

UD&PA hnuai faina lama thawktute hi mipui vantlang hnawmhawkh leh in chung bawlhhlawh te khawn khawm a, a thehthang leh sawngbawlina lam buaipuitu leh vantlang hmunhmate thian faitu an nih angin bawlhhlawh nena inchiaphiah renga hna thawk an ni a. Fimkhur takin hna thawk mah se, natna hrik leh bawrhsawmna hrang hrang kai awlsamna hmuna thawk an nih avangin an hriselna dinhmun ngaihven a ÷ul hle a. Hei vang hian Swachhata Hi Seva 2024 kalpui chung hian an hriselna dinhmun endik tura ruahmanna siam niin, vawiin khan H&FW Department Lunglei aþangin doctor pahnih, nurse, pharmacist leh thawktu dangte chuan a thlawnin an hriselna dinhmun hi an endiksak a. Thisensang, zunthlum, pan/lawng (ulcer), rannung seh (scrub typhus) leh sikserh (malaria) natna an vei leh vei loh te endik niin, sakawr ek hrik (tetanus) hri danna (vaccine) pek nghal an ni bawh.

Lunglei District Urban Development Officer Pu C. Sawihlira chuan UD&PA hnuai faina lama thawktute hriselna a thlawna endiksaktu H&FW Department Lunglei chungah lawm thu a sawi a ni.

<><><>

LAWNGTLAI

Lawngtlai AH & Vety Department chuan Lawngtlai leh a chhehvel khuaa Bawngvulhtute tan ran ching enkawlina an buatsaih.

Lawngtlai AH & Vety Complex Farmers Hall, a he hun an hman hi Dr.Charlie C.Chawngthu.Veterinary Officer, chuan kaihruaiin, Lawngtlai khawpui leh a chheh vel khuaa Bawngvulhtute harsatna hrang hrang nei an awm thin a, chungte chu an hnena thlen zel tura chah in, a theih ang anga an harsatna te sutkian anih theih nana hmalak ho an in huam reng thu a sawi bawh.

He hunah hian Dr. Lalthazuali, Subject Matter Specialist (Animal Science) KVK Lawngtlai chuan Bawngvulhtu kalkhawmte hnenah Zirtirna a

pe a, bawng No neih leh No a pai hun chhunga enkawl dan tur te, Bawng inthlah chhawn lama harsatna awm thei leh a chinfel dan turte bakah, Bawngvulhtu ten hlawk zawka bawng an vulh theih dan tur te sawi fiahin zirtirna a pe ani.

He Training ah hian Lawngtlai Khawpui chhung leh lawngtlai khaw chhehvel khua a Bawngvultu 20 vel an kalkhawm a, Training a kalte hnenah hian Bawng Vitamin leh Mineral Mixer a thlawnin an sem nghal vek bawk ani.

<><><>

J&K ELECTION

Jammu & Kashmir Assembly inthlan thawh thumna atan tukin dar 7 atang khan vote thlak a ni.J&K Inthlan hi thawh thuma neih niin thawh khatna leh thawhnhina te hlawhtling taka neih alo ni tawh a. September ni 18 leh ni 25 ahte khan vote thlak niin vote zaa 61.38 leh zaa 57 a tla a. Inthlan thawh thuma vote te hi a rualin tun thla ni 8 ah chhiar a ni ang.

<><><>

PM TALKS TO ISRAEL PM

Prime Minister Narendra Modia chuan nimin khan Israel Prime Minister Benjamin Netanyahu biain tunhnaia Asia khawtlang lama thilthleng mekte a sawipui. Social Media-a a tarlan danin PM Modia hian firfiaka chetna chuan khawvelah hmun a chang lo tih a sawi a. Innghirnghona leh indona boruak sang zel tur tihdaih chu a pawimawh thu sawiin mi hrente pawh him taka inchhuahsak a ngai a ti a. India chuan remna leh muanna a awm theihna turin thawihtawp chhuah a inhuam thu Israel PM hi a hriih bawk a ni.

<><><>

PRESIDENT

President Draupadi Murmu-i chuan sawrkar laipuiin ramchhunga damdawiin leh damlo enkawlnate tilian turin hma a la zel a ti. Pi Murmui chuan Ayushman Bharat-Pradhan Mantri Jan Arogya Yojana hman anih avangin hmeichhiate tana damlo enkawltha tha zawk pek a ni a ti bawk. President Murmu-i hian nimin khan Atal Bihari Vajpayee Institute of Medical Sciences Convocation vawi 10-na Bew Delhi-a Bharat Mandapam-a Dr. Ram Manohar Lohia Hospital buatsaih a hmanpui a. He hunah hian Super Specialty zirchhuak mi 36 bakah zirlai dang te hnenah degree a hlan a ni.

<><><>